

東華續錄

光緒十五

臣朱壽朋敬編

臣汪錫增恭校

三月丁巳朔祭 奉先殿行釋服禮告祭於 太廟命奕訢詣 几筵前恭代行禮○文煜丁日昌奏閩

省吏治因循成習積案纍纍未定罪犯及牽連人證禁押既久動致拖斃是欲蘇民困當以清理庶獄爲
先必澈底根究悉心體察揭明其所以然之故俾和盤託出纒結方可盡除必力破拘攣劃示懲勸稍原
其不獲已之由俾改轍弗迷而倒懸方可速解臣等前經查明匿報詞訟各廳縣兩次彙參摘頂勒限清
結並擇其尤爲泄玩者如甌寧縣知縣鄭啟明福清縣知縣魏弼文等分別奏參革職查辦一面嚴催各
屬認真經理隨時告誡幾於筆禿脣焦半年以來統計辦結新舊監犯三十二名各廳縣所報冊內名數
與密查實有人數尙相符合惟押犯往往有冊中僅報數名實押至數十名者卽如廈防廳押犯八十餘
名而冊報僅止數名石碼廳押犯二十餘名而歷報並無押犯以此類推各州縣之匿報漏報者實指不
勝屈而且有書差私押而門丁不知門丁私押而本官不知百姓或農工度日或小本營生一人被押卽
一家不得安枕必賣田宅鬻妻子經營請託而後始得釋放回家當官吏博弄飲酒之時正小民呼籲無

門之時此中嘆息愁恨之聲豈不足以召水旱而干天怒自經臣等嚴加查究各州縣於冊報有名之押犯已結釋一千二百四十六名其未登列冊報以及書差私押計釋放者蓋又不止數千人矣尤可詫異者如壽寧縣監犯李喧淦遇赦年餘尚未釋放嚴札申斥該縣尙稟覆以犯人戀監無心求釋將樂縣押犯楊長吉飭查因何事久押不放而該縣則稟覆以係歷任流交之犯並無案卷可查寧化縣監犯管福以入會被禁多年現據訊明實係誣扳諸如此類殊甚憤懣均皆批飭立即保釋現計通省未定案監犯尙有二百九十餘名此等罪犯命盜居多或嚴刑所逼供詞先後翻異或書差所指供詞始終游移或僅認爲從而正凶未獲或竟訴爲冤而原告堅執干證毫無逸犯難獲問官拘以成例不敢斷結細閱各該縣牘當時如果據供定案轉在可援赦邀免之列因其供詞前後不符反繫待質不得仰沐皇仁於情亦復可憫至各該縣縣豈盡無良實緣歷年接替先後參差或因尋緝正凶有贖線之費研鞫定案有招解之費一經隔任罕肯代爲擔當雖承緝例有處分亦已無可加重該犯既狡展不承本官亦躊躇候代任復一任年復一年欲辦不能欲釋不可遂致積重難返陳陳相因目下可辦者均已辦釋未辦者皆窒礙難行無從措手如照例悉與推究處分直須官舍爲空臣等目擊情形殊深焦灼倘再不設法整頓坐使羈囚對泣不至瘵斃不止既失天地好生之德亦辜朝廷欽恤之仁合無仰懇天恩寬其既

往准予暫行變通辦理以期圖屏一清擬請將光緒元年以前積壓各件如係遲延有因邀免扣計限期應招解者卽行招解並由司酌量籌給解費以免瘠區藉口賠累其事在 赦前罪應援免者由該管道府就近勘明詳結釋放至搶竊等案人犯無贓無證訊係誤拿者卽立予省釋或先有證佐後復狡翻以及開設花會書差詐擾教唆詞訟擄人勒贖一切爲害閭閻情節可惡而供證未明此等桀黠之徒若一律准予釋放非變爲盜賊卽流入異端擬請照搶竊鎖墩之例分別酌定鎖繫石墩以示懲創而免羈禁至牽涉命案及一切雜案人犯或供情狡展或證佐未齊因而延宕不結者比比皆是擬請援照正犯在逃餘犯監候待質之例如各犯禁押年月已逾例限卽照現供定擬發落倘未滿限則扣計何時屆滿如逸犯無獲再行擬結其餘詞訟細故干連人證立卽訊斷釋放並由司遴委明幹之員攜帶先前調到各案卷與之講求明晰如臨審情節互異准其稟明候示辦理不致墨守成見已分投馳赴各屬會同廳縣統限年內一併查辦清結以仰副 聖主痼癘在抱刑期無刑之至意倘印委各員敢再泄玩從事逾限不結卽行嚴參其能勘斷明悉執法持平一洗積習者並仰懇 天恩准由 臣等酌量保獎以昭激勵是前此旣寬其因循之咎以後復予以拔擢之榮當無不愧奮而思自效者矣至此後新收之案仍各照定例辦理不得再有積壓仍蹈前愆倘尙有私押匿報等弊卽當從嚴參處得 旨下部議奏○文煜丁日

昌奏前因閩省各屬造報詞訟押犯多有偽造匿報等弊經臣等兩次奏參將署閩縣知縣雷其達厦防同知李鍾霖等二十員一併摘頂聲明勒限半年責成在任各員將積案結清再行奏請開復先後奉旨允准在案茲自三月至七月連閩半年限滿各該廳縣將積年詞訟一律查覆補報押犯亦據實報明次第釋辦如羅源晉江長汀莆田寧德等縣積案已全數結銷噶瑪蘭侯官惠安松溪南安邵武等廳縣已結銷九成或八成有奇臣等查前此該廳縣或捏造詞訟或隱匿押犯以報冊爲具文以懸牌爲多事以羈候爲不足惜以積案爲無可稽任意欺朦頻年延壓僅予摘頂似尙罰不赦辜惟念積習相沿非只一人一縣之事故擬稍事薄懲俾知振作幸蒙聖慈允准該廳縣等知所欣感亦復知所畏懼是以一經懲創均能爭自濯磨現已漸無延案私押之弊民困藉以稍蘇臣等不敢徇庇其短亦不敢稍沒其勞因念國家賞罰黜陟正所以鼓勵人材該廳縣等就事論事似尙能痛戒前非合無仰懇天恩俯准將噶瑪蘭通判洪熙儒署侯官縣知縣吳森羅源縣知縣張金鑑晉江縣知縣金錫蕃南安縣知縣程鵬惠安縣知縣俞珣松溪縣知縣汪興祿署長汀縣知縣蔣寶光邵武縣知縣顧玉琳署莆田縣知縣吳光漢署寧德縣知縣張道亨等十一員一併開復頂戴以昭激勵尙有原參各員仰乞天恩暫行展限半年俟確查能否一律清結另行分別辦理得旨洪熙儒等均著開復頂戴餘依議○戊午劉錫金

奏查官員堂會原不在例禁之列本年三月初五日恭遇 穆宗毅皇帝三周之辰雖三年之制已滿而

梓宮尙未奉 安凡在臣工宜無不同深悲感伏讀二月十五日欽奉 皇太后懿旨現在梓宮尙未

奉安所有年終筵宴均著暫緩舉行等因欽此是 皇上於應行典禮尙不忍照常舉行而爲臣子者受

穆宗毅皇帝高厚之恩瞻仰 梓宮何忍遽行宴樂況官員堂會演戲既非必不得已之事而又值時

事艱難民生困苦亦非現時所宜相應請 旨飭下五城御史衙門出示曉諭自本年三月釋服後至奉

安以前凡官員等堂會演戲之處概行禁止以崇 國制而肅官常 上諭御史劉錫金奏官員堂會

演戲仍請禁止一摺 穆宗毅皇帝梓宮尙未永遠奉安前奉 兩宮皇太后懿旨將應行典禮分別舉

行停緩大小臣工均受 先帝厚恩現在雖經釋服 山陵尙未奉安若遽行照常宴樂自必有所不忍

所有官員等演戲讌會仍著概行禁止○保德以疾乞休允之○崇厚奏查奉省北邊外昌圖廳所轄幅

員一千六百七十里蒙民雜處盜賊出沒無常廳屬朝陽坡地方曾聚匪徒抗官拒捕同治四年經 欽

派原任大學士文祥帶兵痛剿始臻安謐該廳本係蒙古地界邇來流民日多耕種殆遍械鬪命盜之案

層見迭出祇以同知獨任其事分設經歷照磨各一員襄同佐理地大事繁實有鞭長莫及之勢曾經前

署將軍尙書崇實統籌奉省全局以該廳亟須添官增兵藉資治理而廳屬地租向歸蒙古自管無款可

籌因請試辦河稅斗租以爲經費奏明在案旋經崇實飭派委員前往會同該廳趙受璧妥定章程試行辦理該處商民以此款爲設官增兵之用亦甚樂從計自上年六月以來河稅一項因河水淺涸船隻難通未經開辦所有斗租試辦半年業已收有一萬七百三十餘兩除去委員盤費尙存九千九百六十餘兩就現在試辦每年可以收銀二萬一千餘兩雖不能作爲定額以之設官增兵尙敷支用目下地方甚關緊要所有應行新設添設各官自應及時議定請 旨遵行查前署將軍尙書崇實原奏擬將昌圖廳同知升爲知府再於梨樹城增設通判一員八家鎮增設知縣一員並於廳屬以南康家屯地方增設知州一員分設佐雜各官相助爲理等因現在奴才等察看情形康家屯一處離昌圖較近似可毋庸添設知州擬請將該廳升爲府治仿照熱河承德府之例仍管地方詞訟各事卽康家屯地方亦可歸其自理移設八家鎮經歷於康家屯分防再移梨樹城照磨於八面城駐紮均照舊請加六品銜分司緝捕土匪並勘驗命盜各案凡有地方詞訟戶婚田土細故准其就近審理徒罪以上送由該府訊辦並將廳巡檢一員升爲府司獄訓導一員升爲府教授既足以重地方亦可以符體制此奴才等現擬升設昌圖府之情形也八家鎮梨樹城兩處原設經歷照磨各一員分防佐理該兩處均係扼要之區政務殷繁措理非易該經歷等職小權輕勢難整頓今擬將梨樹城改爲廳治添設通判一員名曰袁化廳另添巡檢一員

管理監獄八家鎮改爲縣治添設知縣一員名曰懷德縣另添典史一員管理監獄並均添設訓導各一員以興學校該廳縣應照章請加理事同知銜以便蒙民兼理所有昌圖府自理詞訟徒罪以上之命盜各案應申詳驛巡道審轉以昭慎重至奉化廳懷德縣自理詞訟徒罪以上之命盜各案則應詳由昌圖府審轉徑詳府尹核辦此奴才等現擬添設廳縣教佐各官之情形也似此星羅棋布既有提綱挈領之人藉資表率亦復畫界分疆而治各專責成但使地方慎選得人不難從容整頓惟是該處地廣民頑盜風未息東北直接吉林邊防尤難鬆緩現在三盟及吉林各客隊在彼駐紮馬隊有四五百名之多兵力尙覺單薄邊外情形實與內地不同若非多設捕盜弁兵非特緝捕難期得力且亦不足鎮壓地方現擬於該府廳縣另添捕盜營馬兵二百名交昌圖府分撥調遣以專責成所需餉乾照章給發卽由此項斗租支銷以該處之所出供該處之所需既免另籌餉項並可撫輯閭閻莫此爲便至於學校之事風化攸關現既升設府學教授並於奉化廳懷德縣添設訓導各一員若不增廣學額無以鼓勵人材自應酌量議增以廣教化俾令地方有所觀感庶幾默化潛移民風漸歸敦樸以副朝廷綏靖邊陲之至意其修建衙署監獄各費卽在上年秋冬兩季所收斗租項下動用如有不敷仍在本年所收斗租開支廉俸工食捕盜兵餉馬乾餘存項下次第興辦以上擬升設添設各員如蒙 俞允相應請 旨飭部頒發印信

關防以昭信守下部議奏○庚申延煦奏新設圍場糧捕同知請飭部鑄鑄關防頒發慎守下部知之○
延煦奏准戶部咨開圍場新設糧捕同知一缺應於同知屬下添設同知司獄一員專司監獄又因地方
廣闊應於西圍添設巡檢一員協同緝捕等因應請飭部鑄鑄分防圍場同知司獄印信西圍巡檢印信
各一顆給領任事下部知之○魁玉文格恆訓奏請添旗營精銳兵丁以次訓練下部知之○辛酉允馮
子材來京陛見○陝西延綏鎮總兵記名提督劉厚基卒交部照提督軍營立功後病故例議卹以譚仁
芳爲陝西延綏鎮總兵○壬戌吳元炳奏上年十月初間江北飢民紛紛過江流至蘇州者千百成羣殆
無虛日臣卽派員在省城外擇寬敞地方分投設廠盡數截留災民中扶老攜幼徒行而至者歸入旱廠
每日煮粥給予兩次每大口約米八合小口減半其原來有船者則編號歸入水塢按大小口給予錢米
聽其自炊復每名酌給柴草棉花以爲禦寒之具其有疾病生產者另備醫藥棉布並通飭各屬一體遵
辦所有籌辦各情形業經督臣會同奏報在案臣又恐各災民流離四出去鄉愈遠將來歸籍愈難且屬
聚一處人數過多尤不免滋生事端因卽飛飭江藩司酌撥款項分發被災各州縣確查派賑並咨商督
臣會委候補道張富年督同委員估濬鹽阜高寶等處河道以工代賑此爲未出境之災民計也二面派
委候補知府崔繩祖馳赴揚州並札署運司劉瑞芬候補道徐文達督同該守開辦賑賑截留又派候補

知府錢寶傳赴沿江之江陰鎮江設廠收養並函致留防江陰統帶武毅軍福建提督唐定奎就近督同經理又派候補知府田祚赴鎮江會同府縣辦理粥廠此爲未過江及甫過江之災民計也其先過江者則在蘇州常州等處分廠留養並分撥松江太倉各屬安插及蘇城水旱各廠共留養一萬六百餘口又前福建布政使潘霽內閣中書馮芳植先後集資認養五千九百餘口派撥蘇松太各屬分養者八千數百口常州收養三千一百餘口江陰收養四千六百餘口鎮江收養三千數百口揚州收養四萬一千九百餘口又隨時分起遣回就地給賑者九千四百餘口惟是人數衆多經費難籌臣先飭蘇藩司與釐局酌撥銀二萬兩解赴漕臣衙門以備淮徐兩府粥賑之需江陰先後由司局撥銀九千兩揚州開辦之初先由上海墊撥銀五千兩奏准裁留籌備餘米一萬三千餘石及此項節省水脚銀三千六十餘兩一併湊濟賑需卽以一半米石解赴揚州一半米石暨水脚歸蘇城撥用並於省城豐備倉借撥錢八千千文復令署臬司薛書常會同內閣中書何慎修遴派委員挑取強壯災民開濬丹陽河道先撥上海賑捐銀一萬五千兩此外有由各屬就地籌捐者有由州縣捐廉發給者東羅西掘正在支絀之時續奉 恩旨准截漕米一萬石遵於抵徵採買數內撥出濟用此次在事委員與地方各官無不仰體 皇仁實力實心規籌周至杜絕冒賑嚴防滋事節據稟報收養情形災民隨廠就賑均與地方相安無事綏靜不擾足

以上獄宸廑計自冬初迄今留養幾四閱月查江北上年被旱地方已得大雪數次土脈膏潤各災民均有田可耕亟應遣令歸籍趕種春麥臣已先飭淮徐揚海各屬豫購籽種以備借給現擬於三月初中兩旬內將各災民分起委員押送回籍口糧發至二月底止另備三月份一月口糧以爲遣資臨行按戶給票除省城紳士留養者自備資遣外其餘約計遣費銀一萬有零已由臣與司道暨蘇松常太各府州縣分別捐齊交與委員帶往江北俟災民到地後查照先給之票按戶給領至豐備倉穀現奉諭旨准撥三成卽就省城所養災民中查其向種田畝若干酌量給予穀種以爲歸耕之資此目下籌辦遣資之情形也除俟資遣事竣分飭各地方官暨委員將經手支發各欸核實造銷彙開清單咨部查照外謹會同兩江督臣沈葆楨恭摺具陳報聞○丙寅楊昌溶奏擬辦縣役糾約散堂挾制本官下刑部議奏○丁卯文煜奏閩省內地續添水陸練營以期純熟而資分布下部知之○以前署紹興府知府甘炳等審案疲延交部議處○京師雨○己巳李元華奏臣出省督挑北路運河並查勘濮范兩處堤工業將出省日期附片奏報在案拜摺後隨即由省起程先赴東昌一帶沿河各屬按照估挑運河工段逐段週履督飭承挑委員總宜實力督工不准怠玩從事各該員等深知事關漕運均各實心實力奮勉督辦現在北路上下河身淤淺各處一律動工將來漕船到境必期揚帆直進淺滯無虞臣復諄飭承挑各員督率夫役

竭力深挑總期多盡一分人工卽多得分實際不惟一時補苴之計且爲日後經久之圖以仰副 聖
主慎重河防規復運道之至意至濮范一帶應修堤埝臣亦便道親往查驗均已督飭興工現在黃河水
勢甫消辦理尙易爲力近河居民均知利害切身莫不踴躍趨公爭先恐後臣復面加獎諭鼓勵羣情並
飭監工各員認真督催務期餉不虛糜工歸實在不准稍有草率臣督勘事畢卽於本月初十日水路回
省沿河民堤均尙穩固經過各屬察看陽雨應時麥苗芄茂地方民情亦均安謐洵堪仰慰 宸懷報聞
○庚午文煜奏准部咨議覆貴州省設立軍民待質公所章程行令各直省察看情形可否倣照籌辦查
明具奏等因奉 旨依議欽此欽遵咨會到閩伏查閩省民情刁健詞訟繁多所有提審委審案件牽連
人證羈押待質情形實堪矜憫曾於同治十三年間倣照浙省成案在省會設立候審公所將各案待質
民人徑發該所委員專心經理一切章程核與現在貴州撫臣原奏大略相同前兩淮鹽課大使湯用中
原議亦經發司刊刷成本通飭遵辦並因各屬積案纍纍經臣與丁日昌先後奏請設法變通勒限審結
原期案牘一清可免人證之拖累也茲准部議提解犯證遲延處分及看管委員功過章程至周且密閩
省自應一體遵辦其待質民人所需經費並遵新章照監犯日給口糧鹽菜之數自光緒三年正月起由
藩庫撥欸按季支銷仍隨時實力稽查不准陵虐剋減一面督同認真審理務期案無留牘民鮮拖累以

仰副 聖主矜恤庶獄之至意報聞○諭朕奉 慈禧端佑康頤昭

豫莊誠皇太后懿旨惇親王奕諒等奏遵旨相度 太廟中殿位次請飭廷臣會議一摺據稱我朝自順

治初年創定 廟制迄今 列聖廟享中殿龕位已與九間之數相符等語 穆宗毅皇帝 孝哲毅皇

后神牌升祔供奉位次鉅典攸關著王大臣大學士六部九卿翰詹科道虔詣 太廟敬謹相度後會同

惇親王奕諒等妥議具奏○辛未予貴州歷年陣亡官紳唐廷楨等旌卹○諭載鋼等奏 西陵禮部贊

讀官向例與八旗驍騎校一體揀選防禦升補後仍兼贊讀之差擬請嗣後贊讀官補授防禦後卽歸八

旗當差咨報太常寺開缺另補等語向來贊讀官行走十年准補防禦原因其禮節嫻熟是以仍兼贊讀

之差載鋼等所請與定例不符著不准行○命五城飯廠展限兩月○癸酉諭朕奉 慈禧端佑康頤昭

和莊敬皇太后 慈禧端佑康頤昭豫莊誠皇太后懿旨敬郡王現無子嗣著以奕棟之子宗室載煌

改名載沛承繼孚敬郡王爲嗣封爲多羅貝勒所有應辦事宜著該衙門照例辦理○以拐賣女子革參

將尹長林職並歸案審辦○諭前經簡派三品銜候補五品京堂劉錫鴻充出使英國副使著改派該員

充出使德國欽差大臣並賞加二品頂戴○甲戌諭崇厚等奏廳員玩延命案請旨革職歸案質審一摺

署理黑龍江呼蘭廳同知文燮前在岫巖廳任內於民人崔海松被刦拒傷身死一案延不相驗並誣稟

屍子崔翰等串謀勾賊劫取財物等情實屬謬妄文變著先行革職解任由崇厚等移知黑龍江將軍飭令該員速赴奉天歸案聽候質訊如查有被朦偏聽誣陷無辜情事卽著從嚴參辦該部知道○乙亥崇厚奏酌立清訟規制得旨如所請行○崇厚奏嚴禁屍場使費擬另立專條下部議奏○丙子諭鄧華熙奏訪聞廣東陣亡殉難紳民團勇開單懇請旌卹一摺廣東陽江廳等處前被逆匪竄擾該紳民等或臨陣捐軀或從容就義均堪憫惻該御史籍隸廣東見聞較確所有單開之從九品銜陳文熙等五百五十一名均著交部查明除業經得有卹典外餘俱照所請分別旌卹並准其自行捐資建祠以彰忠節該部知道○諭御史鄧華熙奏賤役之子朦捐冒考請旨斥革懲辦等語廣東番禺縣人何炳南卽何菊屏迭充南海番禺東莞各縣門丁膽敢令其子何伯麒朦考入學並捐主事又令次子何駿聲改名何瑞榮冒入順天籍中式丙子科鄉試舉人實屬不安本分亟應嚴行懲辦主事何伯麒舉人何瑞榮均著卽行斥革交劉坤一張兆棟將何炳南卽何菊屏一併按律懲辦以儆效尤而清流品該部知道○丁丑以解清京餉議敘李元華裕祿詔誠楊昌溶盧定勳李鶴年葆亨俱加一級○左宗棠奏臣軍出關餉需上年奏蒙天恩准發部款二百萬兩各省提前解三百萬兩飭各省協款毋得以八成自限如不能解至八成以上部臣從嚴參辦並恩准借用洋款五百萬兩臣念部款二百萬兩各省提前解三百萬兩均

是的餉復蒙 諭飭各省協款以八成上解餉事可期數衍毋庸借用洋款徒耗息銀又前次所借洋款
尙須一年各省始可清還完結若仍於上年議借則新借之款并於本年內劃還本息亦慮各省關周轉
維艱故上年卽不復籌及借用洋款惟出師絕域距協餉各省均在數千里萬里以外而總計已到之餉
實祇供九月十月之需誠慮各省催解不前餉源中斷一面具奏請 飭部臣分別行催一面豫籌借用
洋款定以本年成借分年劃還本息庶事體從容各省得稍紓籌措其洋款尙未籌措之先由臣飭滬鄂
陝各臺局息借華商巨款暫資接濟議俟洋款借到分批劃還旋據各臺局稟息借華商銀一百萬兩迅
解來甘均一分二釐給息並飭上海轉運局員江西補用道胡光墉訂借洋款庶便劃還華商免致失信
而息銀亦期節省旋據胡光墉稟陳商借各情臣批令就可恃巨款訂借成交以憑分別奏咨立案其銀
限以本年三月內到甘適各省關協餉於上臘源源而來不但上年十一月及年關滿餉得以開支加意
撙節卽本年春季亦資敷衍竊計屆時洋款可望到甘除劃還華商外尙有巨款堪資接濟當無臨渴掘
井之虞不料上海洋款被許厚如託詞朦借洋商各起猜疑卽前此親赴胡光墉處承認出借之洋商亦
腦縮不前情形頓異據後路糧臺道員王加敏稟知接胡光墉緘稱訂借洋款事多夾雜雖竭力籌辦未
卜有成與否而進攻南路及規取吐魯番各軍已指春融爲師期奏調填駐烏魯木齊馬步全軍與防護

古城迤西及巴古一帶運道馬步各營業經咨遣出關所需餉糧採運正雜津貼各款至繁且鉅均非預付現銀不辦懸軍深入勢難稍有停待洋款既不足恃協款又無現成巨數可指何以迅赴戎機興思及此殊深焦灼合無仰懇 天恩飭各省關將應協本年西征軍餉提前速解四百萬兩餘均解八成以上俾兵機順利得免意外之虞則大局之幸亦微臣之幸也如一時未能驟集巨款卽照陝西撫臣譚鍾麟前奏各省分向本地富商議息借湊先期解甘仍各按每月應解之數分期劃還商款而息銀仍由西征餉內劃扣在各省無洋款限期迫促之煩無墊息虛耗之累似於各省無損而於 臣軍得有實際可否并請 旨飭下部臣查照譚鍾麟呈開各省應解新餉原單迅速酌議不勝惶悚待 命之至又奏本年正月十七日准科布多參贊大臣保英遵 旨委員墨麟沙蘊喜押解吉爾洪額依勒和布永成等到 臣行營比發交署安肅道福裕收審適甘涼道鐵珊因公到 臣並委鐵珊會同福裕研審確情錄供詳辦茲據詳覆吉爾洪額依勒和布永成等各供詳請具奏前來 臣維吉爾洪額疊次因病告假金順始派員接帶據供起病在未曾委員之先數日然委員業經到營自應及時交卸卽所統官兵因欠餉未到慮其無著亦宜明白開導身留營中聽候核算交代豈可諉稱開導各兵不聽任其譁潰據供各兵疑全福明圖善先後逃逸以爲截取科布多餉銀相率譁潰查全福明圖善潛赴金順軍營原因全軍譁潰慮爲牽制不

能自由故潛蹤赴營自明心跡足見當時各兵洵洵吉爾洪額等不能自主尙非盡屬虛辭惟全福明圖善尙知投歸主帥急明心跡爲是該革員等何以見不及此公然隨隊北行雖據供依勒和布永成由吉爾洪額派令追趕各兵吉爾洪額旋亦跟蹤前往親至老龍布拉一帶節節彈壓及博東齊河始行截回縱圖追趕各兵截回歸伍係屬本心然查其折回乃在烏理雅蘇台科布多奉 諭旨嚴拿之後何能因其有所藉口遽謂情有可原細核吉爾洪額等所犯情節均由其專餉初次被沙克都林扎布奉札截提移遲欠款軍情不無缺望嗣因委代統領又卽沙克都林扎布各兵疑接替之後應得餉項將歸無著遂愆恩吉爾洪額等抗不受代任意北行吉爾洪額又因前次誣訐金順各款經 臣遵 旨按款查明覆陳均屬失實恐不爲金順所容遂至鹵莽糊塗激成此舉疊奉 諭旨交 臣嚴行查辦按律懲治 臣查訊供詞吉爾洪額所犯不服調遣不遵節制任性妄爲雖供吐未能盡實而情罪已屬顯然依勒和布永成雖供無主謀唆鬧等情然不能諭禁并兵復與吉爾洪額隨隊北行論罪何能求減 臣既奉 諭旨嚴行查辦按律懲治自應詳繹律文博攷成案以期允協而肅戎經惟該員等所犯按之軍律刑律中樞政攷處分則例治罪專條情罪均不相符若仿軍興法擬辦未免過重竊維吉爾洪額依勒和布永成等任意妄行正當用兵之際法本難寬然幸天戈所指旋克數城該軍雖背道而馳於大局尙無貽誤奉 旨帶隊